



Bk. Julijans Zečests ar goreidznīkim un vacōkim sovas primicijas dīnā, Ludzā.

Bazneickungu primicijas 1938. g.

Bk. Julijans Začests.

Šo goda 11. junijā guņs līsmom par upuru kriušajā Ludzas bazneicā šo paša goda 22. majā nūtyka naparostas svīneibas. Te, pi skaistō, puču puškūs un zaļumūs sleikstūšō Dīva Mōtes oltora bk. Julijans Začests nūturēja pyrmū s. Misi. Laikam daba paredzēja, ka šōs ratōs, Dīva svēteibu nasūšōs svīneibas šymā Dīva nomā nūteik pādejū reizi, jo nu reita saulainais laiks pēški mainejōs. Saule īsatyna bīzūs leita debešūs, pyute vāss vējs. Kōtrā ocumirklī varēja sagaideit leitu. Par laimi leits naleja un natraucēja lelō ticeigūs daudzuma, kas atlaidu īmontōšonai beja sanōkuši nu Pyldas, Pušmucovas, Sarkanu, Styglovas, Eversmuižas, Aizpūru un Istālsnas draudzem. Daži tōlōkī, kai nu Brigim, Raipoles un Brodaižim beja ībraukuši ar vilcīni.

Primiciants bk. Julijans Začests, Franciska un Īvas Začestu dāls, dzimis 1913. g. 20. decembrī (v. st.), Ludzas draudzes, Zvērgzdīnes pog. Lauču cīmā. Pamatizgleiteibu īgīvis Runtortas latvišu pamatskūlā, bet vydusizgleiteibu Ludzas valsts gimnazijā. Goreigā Seminarā jū aizvede na vīglas dzeives izredzes, bet dedzeiba par dvēseļu pestišonu. Daži dūmoj, ka jauneklis, izvālādams sev goreidznīka kōrtu, meklej vīglas, ērtas dzeives. Taidi rupi moldōs.

Goreidznīka, prīstera dzeive nu pyrmōs dīnas ir caurausta sōpem, pildeita pašaizlīdzeības upurim. Prīstera ceļš vyscauri ir klōts osim ērškīm, prīstera bīkers ir ryugts leidz golam. Prīstera krūņs ir ēršku krūņs, taidis pat, kaids puškōja Pesteitōja golvu. Primiciants zynōja, kaيدا byus prīstera dzeive,

tūmār nabāga nu tōs, bet uzticeigi un naatlaideīgi gōja, kur Dīvs lyka jam īt. Gōja ar drūšu cereibu, ka Dīvs paleidzēs jam vysōs gryuteibōs. Nūstōjis pi Kunga oltora, īsōkdams pyrmū s. Mises upuri, kurā ari pats sevi upurēja Dīvam, jaunais prīsters mīrināja sevi psalma vōrdim: „Kōdēl skumsti muna dvēsele un kōdēl esi uztraukta?... Cer uz Dīvu; es vēl slavēšu jū — munu pesteišonu un munu Dīvu.“ (Ps. 42).

Mōceibas teicējs, Nautrānu dekans bk. Deksnis, tālōdams prīstera pīnōkumus, atgōdynāja primiciantam, ka Dīvs byus ar jū, ka ticeīgūs cylvāku lyugšonas paleidzēs jom veikt smogū un atbildeigu prīstera dorbu.

Primicianta cereibu un mōceibas teicēja vōrdus ar sovu klōtbyutni aplicynāja sērmais Kristus prīsters, dekans O. Urbšs, kas beja primiciantam par archidiakonu.

Šō augsti cīnejamō prīstera vadeibā nūturātō pyrmō s. Mise cēle augši primicianta goru, izdzēse jō dvēselē vysas bailēs. Ari pōrēji prīsteri, kai Dovgialovičs, Cercīns, Podlevskis, Trepša, nu jaunōkim: Jankovskis, Pudans, P. Tumans, Kapacis, Kopeiko, Vitānis, Bojars, kas beja īsarodu! svineibōs, dzeivi aplicynāja, ka Jezus Kristus, vysuaugstōkais Prīsters ir vysu Jō prīsteru spāks un celvedis.

Ticeīgī, it sevišķi primicianta dzymdynōtōji, brōli, mōsas s. Komunijas laikā sirsneigi lyudzēs par jim dōrgū prīsteri.

Un jaunōtne, sodales, Eucharistiskō bārnu kruciata! Tūs lyugšonom lela vara par Jezus Sirdi. Tī spēja izlyugt jaunajam prīsteram jū bogōtas Dīva žēlesteibas.

Skaisti nūstōdeitais bazneicas dzidōtōju kōrs un orkestris cēle svineību daili. Pēc s. Mises primiciants gondreiz divas stundes izdaleja ticeīgim primicijas svēteibu. Ticeigajūs beja monoma lela saiyusma un priks.

Dīvakolpōjumam nūsaslādžūt primiciantu sveice: Ludzas draudzes bārnu Eucharistiskais pulceņš un pasnēdze skaisti veidōtu adresi un pučes; Jaunovas Marijas kongregācijas vōrdā sveicīņus nese skūl. Ragaūsis un pasnēdze skaistas rūzes. Sveicīņus syuteja apriņķa pašv. vac. VI. Sloskāna kgs un bejuši audzynōtōji: insp. A. Garijōnis un Ludzas latv. pamatskūlas pōrzinis A. Teicāna kgs. Ludzas drau-

dzes, Ludzas gimnazijas audzēkni apsveice primiciantu pasnādžūt skaistu grōmotu. Kūpejōs maļteites laikā, pi dekana runāja V. E. veiskups Urbšs, dekans J. Deksnis un Ludzas gimn. direktors I. Turkopols.

Primiciants atbildes runā eisūs, sirsneigūs vōrdūs izteice sovu priku par bejušūs audzynōtōju un cīnejamūs goreidznīku pīsadaleišonu primicijas svineibōs, pasateice par apsveikumim un laimes vēlējumim un lyudze klōtasūsūs pījimt nu jō vyslobōkūs laimes vēlējumus un paleidzēt jam turpmōkā dzeivē gon ar lyugšonom, gon ar tēvišķim aizrōdejumim, lai lobōk varātu izpildeit Dīva uztycātū pīnōkumu.

Ni primiciants, ni V. E. veiskups Urbšs — Ludzas dekans, ni visi pōrēji prīsteri un tū vairōk ticeīgī, nūslādžūt šōs primiciju svineibas naparedzēja, kaids pūsts pīmeklēš jūs vysai tyvā nōkūtnē. Naparedzēja, ka krōšņais, mōkslas dorbim pildeitais dīvnoms, kurā sovas primicijas nūturēja V. Eks. veiskups B. Sloskāns, bkgi: Kivrāns, Samušs, Rukmans un Vitānis, kriss gunei par upuru.